

樂志堂文集

樂志堂文集卷七

南海 譚 瑩玉生撰

送廣州太守程月川師擢任山東備兵充沂曹濟
序

謝太傅無當時之譽去日猶思盧尚書有舊國之恩何
年復至此扶轂者皆知戀慕遮車者更願奔追也況以
望同吳粲虛邀顧邵之知才異崔元屢藉符融之詔有
不拜朱輪而憊悵仁阜蓋而謳歛者乎師之初來吾粵
也鳴絃下縣製錦明廷操墨綬而試能綰銅章而展効
固已功同卓茂績比劉寬玉白冰清雲垂風抗矣旣而

寇氛不靖兵氣莫揚師以降雨劉昆學乘風宗慤以栽
花潘岳作投筆班超獻方畧於軍門下樓船於海島金
波溯湃錦帆分劍戟之光鋏颺嶙峋銅礮壯旌旗之色
橫剽蛟鱷直斬鼉鼉卒致鯢壑烟消鯢溟霧洗

先帝重和洪之武畧特授龍州大臣思柳儉之能名復
除廣漢隨車沛澤露冕宣風布田仁會之精誠廣陳伯
元之威惠謂養農之事首重陂塘謂訓俗之方必由學
校近同馬亮浚築隄溝上繼秦彭敦崇庠序高允葺召
公之廟孔融貽根矩之書孟嘗革弊而珠還謝傑祝民
而虎斃初臨僻郡迭刺雄州莫不政簡刑清目張綱舉

迨至分符清海弭節珠江兒童爭竹馬之迎傳舍喜驂
駢之至或謂扶胥舊壤殷繁自軼於他州甌越名區豪
侈實踰於別部加以戎麾悉駐奔走實勞眾但逐于趨
鳧孰果稱其展驥而師顧持之以清淨鎮之以廉平正
本澄源聽聲察實下庾征西之教首重彝倫移虞內史
之書廣延道素特牛草馬悉定章程畦韭籬榆不嫌煩
碎明獎善防淫之意約束彌嚴揭抑强扶弱之心規條
倍切而且敝車羸馬皮褌布衣雷厲風行芒寒色正鄭
文發不爲烜赫楊公同綽有循聲垂箴或勒于州門作
記或書于廳壁王龔按劾豈畏豪强左雄清嚴詎受請

託何敞治汝南之獄必本春秋袁煥緩河內之民務存
鰥寡奪田十頃祇給寒單在郡廿年未迎妻子僚佐擲
擣蒲之器親朋贈荔子之圖苞苴不入於戎藩竹木定
儲於公府運陶侃之甓晝夜不遑酌吳隱之泉夷齊曷
愧遂使囚無滯獄事不留曹境仰神君郡歌慈父紫馬
厘三城之望琴鶴皆仙朱幡行十縣之春桑麻如繡心
能穿地燭可照天子惠且著以威聲煩劇不妨其靜理
宣城訟地或作閑田華州流民悉居義舍金聲玉色爭
傳中散之廉能風觀月橫亦見子才之善政已謂治平
第一才氣無雙矣更於化導之餘承流之暇脩學舍立

儒宮仿周舜元之清規踵王仲達之芳軌越華院裏重
觀璇題粵秀山前聿新鴻構育百城之俊彥庇十郡之
翹英猶恐風聲所逮德教未宏爰尋羊石之故基更訪
穗城之舊宇商州治賦亦有羨銀濟北公田猶多沃壤
經營荒址締構層軒慮遠謀長彙三成一舊章攸革度
以宏規眾費所資給之私祿袁彥章表章行誼盧道將
優禮儒生接以恩顏親加督勸集衛隆元鳳吏曹悉令
受書置儒林參軍舊族偕行釋菜求之近代豈有同符
例以古人固當並轍所以凡生嶺海皆深翹伫之思忝
屬麾幢益切瞻依之意至如瑩者名翰雀籙智乏雞碑

品未著於鄉閭業不傳於家術而乃程才鎖院叨置前
茅挾策膠庠忝居內舍謝眺齒牙之論不惜揄揚裴秀
領袖之譽自深慙慙豈李肅之題品確有定衡羊衡之
藻鑑不無或爽耶何以植門前之桃李亦取樗材培堂
下之芝蘭不遺小草此又如風行原隰而柔桑倍覺其
和露漬山皋而藜蔓獨知其潤者

當亡知南國之政成眷東人之望切進蘇則以護羌校
尉加杜畿以豐樂亭侯賜延年之璽書給向雄之鼓吹
命率官於襲慶俾監郡于山陽

簡在

帝心俯從民欲充沂當盤錯之際實倚清忠鄒魯留淳

樸之風尤須教令棲霞山上羣歌舊旆之臨

師前曾過此地望

海樓中共伫油幢之泣獨惜五羊之士庶百粵之吏民

人解崔帥之靴家畫文翁之像攀轅叩馬截鞚留鞭東

郡則欲得耿純交州則難留士燮維揚道上皆緣釋氏

之香花清水亭邊共讀使君之手迹兩年化雨萬里慈

雲胡牀猶挂于柱間書案亦留于庫裏欲擘肫而無自

思酌酒以何從唯期子壽早刊宋璟之碑所冀於陵不

易袁公之政他日者任城報績鉅野銘勲披一品之衣

綰重金之帶文昌氣旺定知持橐于禁林廉問材優

或更回車于粵嶠讀嶺南一集皆思鼓角之重來移山
左雙旌匪獨辦香之私祝三生福命願師如蜀國章梟
畢世依歸愧我是韓門張籍

送兩廣制府阮芸臺師移節雲貴序

今

聖天子御宇之六年歲次柔兆閏茂我大司馬儀真阮
芸臺師之總制全粵者蓋十年矣寇準以朝廷無事權
司鎖鑰於北門韋皋爲忠武後身久駐節旄於西土人
和歲稔刑清政簡他日耆詳之職志登於史氏且合周
之方召漢之龔黃羊鉅平李鄴侯韓魏國王新建諸公
共不朽焉固無俟末學之侈陳鄙人之翫縷者矣今夏
六月特被量移雲貴之命編氓戀慕士庶僂悒留鞭
截鞅共酌餞離之酒攀輿卧轍齊下感恩之涕况瑩等

者咳唾爲恩眄睐成飾謝公移鎮競賦詩而出祖廣平
遺愛爭琢石而頌德授簡操管掄揚曷旣伏而思之述
泰山之高者不如覆之一簣陳渤海之深者奚若注茲
一勺請抒簣鼓之論詎待芻蕘之詢惟師廊廟所珍公
輔之望借箸表直持鞭況節夙承

帝眷時覆甌而貯名屢從民借誰夢鎧以進秩詩書禮
樂可將中軍知名勇功孰儼元凱頻當重寄屢膺劇寵
裴晉公四登將壇李涼國六遷大鎮方之於師未爲顯
也持嶺海之節久稱清使擁滇黔之旌仍爲外相張魏
公之鎮江淮童兒亦喜陶士行之督荆湘士女相慶古

所稱威騰閩外禮縟區中師之謂矣粵自莊躋啟疆羅
施建國或先秦而徑遂已闢或前明而版圖始隸八百
媳婦跋扈於其前十一總管擾攘於其後或闔省而靡
如內郡或窮陬而比盛中土厥後文教聿興華風已遍
南人不反丞相之威靈倘存西域旣通園令之文章漸
解龜茲笛振樂譜元宗孔雀醯寒歌傳阿襪固迥異於
曩時耳况復

皇輿蕩蕩

帝網恢恢刀耕火種氣桀驚而已馴匏笙蘆管聲淫靡
而亦革刺文翁於蜀郡轉轅已於漢陽經書笙磬侏僊

亦解其音孝弟力田荒僻亦敦其俗又何必馭同黠馬
繼等鷲鷹然後貢丹砂而示心持生金而向化者哉而
不知珠厓棄郡豈漢德之已衰玉斧劃河實宋謀之不
遠亦謂華夷錯雜山川遼阻慮革心之乏術虞使臂之
蔑由耳今雖蛇妖蠶蠱永作太平之民屹鳥蠻花胥游
有道之世而耶火殃徒來偏荒忽靄翠奢香生原騰踏
裔傳傲象性豈終移俗異哀牢情誰可憫或逞負嵎之
勢石色隱天或矜聚窟之謀濤聲劃地或蠻觸之相持
而自忘蝸角或軌轍之獨當而竟撐螳臂叢箐作壘軍
猶捉月而來石砦如階寇反從天以降玉瓶去耳妄矜

神驥之祥紅巾裹頭思符赤犬之讖竊謂結之以恩信
猶必怵之以威嚴撫之以柔和何如示之以廉武乎迨
至疏勒依定遠如天回紇呼子儀作父淮南草木知萬
福之威名延安甲兵貯仲淹之腹腑然後脩庠序明教
化陸懾水慄風同道一歡呼舞忭爭冠帶於康衢襲純
釋裘遺酋豪於太學雞林客去爭攜白傅之詩吐谷人
歸共識子昇之集豈不盛哉豈不懿哉伏願早據槐鼎
延登宰廷獻八章以督民陳十事以匡主材振四海
半旬宣之所經德綏嘉師盡攀留所曾覩走卒皆知司
馬遠夷亦憚王商則東西朔南中外遐邇悉隸帡幪之

內更無畛域之異又何事沾沾於此疆彼界殊方異俗者云也牂牁萬里火雲如蓋香花夾道麾幢遠赴箐雨茅煙冀符私祝于公雅量知容太穆之疎狂萬石威裁早陋阿鄴之才具

師督粵時馭夷多從寬典殆卽昔人恩威並濟羈縻勿絕之意粵人頗有微詞故瑩送行時作此序後乃知其謬也姑仍存之以誌少年之罪過狂僭都忘而老成人經國遠謨不可及已壬寅立秋日自記

送學使翁邃庵師還 朝序

若夫校文數千見士七十高懸水鏡倏轉星輶錦帆張
翡翠之洲玉節弭鳳凰之署類同勦說無待侈陳至謂
陶鈞庶品襟冕人倫魏子材之訓士恒使坐齋江宗之
之知人實推神鑒焚香設誓峻如紅豆風裁訪石搜奇
雅並蘇齋譜系染藍琢玉請看緣道香花送別祖離甯
僅後堂絲竹獨是人誰並載望若松喬謂子春明經
七橋孝廉公
宛登仙恨爲騶僕羊叔子去人遠矣孫公和與僕言乎
我遂菴師丹青之文金玉之度錢徽公望盧誕人師裴
寶座而召九齡擇良笏而授李絳銓度屢掌光華益隆

當返軸乎八閩遽移旌於百粵丹砂玉札同充疾疾所
需秋菊春蘭各極芳華之選但經指授知爲場屋上游
未立聲名何惜齒牙餘論丁孝公之論辨豈必無雙胡
伯始之文章竟推第一荆南秀氣劉之遴果有異才河
朔英靈李德林偏邀特賞而且爭聆說項共諗推袁自
愧樗材猥承藻鑒竊念堂者粵東之鄙儒也愚嘲飲鼈
誤誚亡羊賦昧妃稀書訛帝虎服須棘刺何假外求興
寄竹林猶然易敗卽謂譽齊王令何如未進之時况云
慧比謝公更在生天而後憶昔陳留阮瑀謂官保江
左羅含謂中丞一代楷模諸州準的目蕭疑爲後來佳

器謂宗懔爲有意少年假以羽毛長其光價亦嘗放縱
脫鞴刮腸洗胃不因人熱甚得師風廢蕭琛之二好而
書籍不衰寫王筠之十詠而題署無假文心著就竊嘗
取定車前門律序成何至因循籬下慨自慈雲竟逝孝
水先枯卻洗種蒜竭方術以何爲子銷斷尊痛營求而
靡得已無心於問世更何自而逢時陽俊之傳書市上
誰道古賢劉孝綽訪事塗間反呼騶卒梅檀一瓣空參
鸚鵡之禪文桑半杵竟落鴛鴦之劫誰新壁壘僅逐刀
圭知營道愧其烈心請將軍捐其故技已猶幸更定名
譽大加驅策盼睞成飾咳唾爲恩何知轢謝凌顏便許

攀安提萬會稽竹箭舉藉瑩磨中宿蒲葵頓增聲價敢
以大才相許文詞誇宿構之工原非後進所宗好事有
流聞之什猶復空慚毳毼莫與巍峩以下第劉蕡作杜
園賈誼本無斌媚諂類于疥駝竟不穩穩慙深於舞鶴
今者龍編化遠鳳藻銜新水轉東溟星環北極中琴小
瑟盡帶離聲璧沼環林并增行色三千桃李催開及第
之花八百孤寒齊下感恩之淚所願安仁閑居茂先勵
志杜門却掃棄產營書心織彌工目耕靡輟魏耶弄戟
亦坐板床袁峻抄書必登紙數山川地土合可成圖進
止威儀聞而多悉上之則簪毫弭筆奏賦明廷次之則

握槩懷鉛懸書通國持酒以禮持才以愚何妨萬里云
遙尙冀一言以贈阿蒙已別誰誇刮目相看子判何從
敢謂指心所在若乃錦帳金爐玉堂畫室草五花之判
披一品之衣南雪初飛預卜和羹之讖春風兩度重看
擁傳而來則蠻花犵鳥息壤期之而更無俟鰕生之私
祝已

送中丞祁竹軒師內遷大司寇還朝序

我竹軒宮保師撫粵東者六年

天子命還朝爲大司寇衆期奔赴各願遮留臥轍攀輿
解鞵竊鞚老人純酒釋氏香花是卽可傳烏能無語慨
白水旱頻仍污萊彌望歌興黃鵠迹兆青蛇有燕子以
名田果飛蝗之墮水劉義欣網維補緝或可隨宜段文
昌禴解出游定無愁苦加以乘輶屢到持斧頻來辨獄
記成戒民集在更煩左讞特取

敕裁獄似賈逵三主簿署名而獲已人如張詠好官員
同薦而非難赦格附申拜章仍至公則時裁闕狹整頓

開明殊得物和鬱爲時望書傳一帋藥却數箱鎮定如
常拊拊有漸動鬼神天地王龜齡感特以誠知險要山
川李衛公籌何待畫陶士行竹頭木屑劉季和韋帽複
袍能知石曜純儒轉愧張彝清使但求蔬飯敢具衣裝
王宏傳有言博練政體留心庶事斟酌時宜每存優允
師之謂矣案如流水筆有旋風善政致祥隱其端蹟省
識瀕行遮道代以於陵未須微服泛江端逢彥伯羊公
開府鈴閣蕭然庾監登樓據牀連坐爰於州治屬建社
倉縱假便宜憂國敢如長孺倘能存活爲官遠勝中書
制畧仿平常平貶恰逢乎大有趙越州之勸金帶先蠲

黃承事之來幅巾且拜糜三盂而待煑旗五色而當分
檢校特嚴講求若亟所居民富所去民思非無故矣而
或且謂都典一方榮班八座江南草木當聞張萬福而
知名朔方旌旗代有李臨淮而變色蕭敷行化亦僅清
言孟業自脩足令欽嘆而不知惇史徽音良能準的但
考治平第一不矜材氣無雙經術必本於儒生循聲端
由於長者鎮其流遁藉以轉移威道路以先驅油囊大
槃北生平之雅况龍勺彝尊選極一時求難百輩杜審
權之視事手自擁簾陳良翰之在官心如懸鏡又何必
見同乳虎擊比阜鷗而後千室鳴弦百城解綬也哉或

又謂平糶均輸由來已久創原仲父對有劉般唐則緣
邊膏壤曾費度支漢則大水諸儒仍聞請罷縱謂法程
迥異時勢均非惠止及於并兼事終難於按覆而不知
凶豐遞嬗簿有餘糧瑣屑儲藏田真續命迫流民之繪
罷卽巧婦而炊難終轉徙以無依誰咄嗟而立辦思愛
人以活國能援古以救時宜欣戀而倍常豈煩紆而不
急又况新陳相易農末交資課雨量晴瞻蒲望杏收積
勿壞社司之帳釐然轉運不停商販之舟誰籍顧猥曰
有治人而無治法也哉語曰欲粟賤追李峴其爲感激
曷罄敷揚於戲皋陶明允拜賡元首之歌姬旦德音歸

致袞衣之幕至若^瑩者咳唾爲恩眄睐成飾當今此事
果得推袁到處逢人遙聞說項宏獎之雅訓迪之私別
紙具詳無庸贅已

送前署中丞畢曼年方伯告養旋里序

代

維咸豐屠維協洽之歲月在季秋前署廣東巡撫曼年
畢公以廣東布政使司告養旋里夫彤弓玉節紫綬金
章屢賦懷親未遑度嶺八州作督慶七秩之曾開一日
養親晉三公而可易列戟返郎君之谷母尙康彊舉觴
盈連帥之門

帝先存問當歸庸寄寸草工吟餉絕域之葡萄供寒庖
之竹筍兒猶元鬢客有黃裳導輿仍若褐衣視膳肅然
朝服洵帟帷之至樂殆主組之殊榮已然而公願報劉
民思借寇博唯孤注能全局而盡翻琴擬再彈俟更張

而漸改撫綏重譯保障一方輯戒外之蠻夷當留士燮
推禁中之頗牧誰似畢誠班景倩行擬登仙李君奭
去爭祈佛歸艤已駕詎可無言維公懷橘綺年折筭卯
日實鍾靈於岱嶽宜拔萃於孔林記續登科譜傳理縣
軼羣之量冠古之才擅吏部之文章紀明州之政績練
知兵事屢靖夷氛方擊楫以渡江業投戈而款塞草檄
爭推傅永飛書咸讓陳琳沙量或唱米籌檀公上計潮
射親擊鋌弩武肅英風同防海而伐謀乃憂邊而思職
虞允文之却虜交賀儒生滿景侯之厯官有勳方任弩
牕矛穴暇張醺於西湖丹轂文軒願角巾於東第日者

蠻海搆兵佗城易帥 命隨使節遠涖征輶霧閣星營
風船火艦擬擒頡利誓斬樓蘭 詔擢大藩旬宣東粵
意先人物條錄吏材劉宏傳一紙之書趙儼却數箱之
藥裴垵選任豈有幸人高瑀清忠當無債帥堂真懸鏡
路贍遺衫尤嚴一筆之勾慎作三刀之夢值負嵎之猛
虎同奔穴之脩蛇豹胎已成蠹目最忍遽能投鼠未可
屠鯨經濟原同新建八寨當平贊襄縱比皋陶三苗漸
格富鄭公之居政府方議金縢寇平仲之在北門權司
鎖鑰諒無常智庸有怯時顧墮甌而仍完斬亂絲而復
理進張良而借箸器王覽而贈刀雙井放鷹七門盜馬

恣睢如故佯驚破柱之求恩怨兩忘妙寓轉圜之用恩
猶父子觀勢面而可知謀若鬼神決攻心而誰測開府
殆一時之選道著懷柔緣邊當萬里之衝望先持重昨
由方伯暫署中丞夙擬建樓久居盡購沿海列肆驕虜
業乘千帳居人原有萬家難論江統徙戎奚啻石郎割
地少陵廣廈老佛祇園魚網鴻離新臺亦圯鵲巢鳩據
之子安歸避兵則各各倚裝賣宅則家家題帖日月其
逝惟蟋蟀之在堂風雨所漂復鴟鴞之毀室且有頽垣
斷井賸水殘山方插棘以編籬擬誅茅以開逕蕪城欲
賦同鮑照之悲涼滄海橫流任王尼之去住公乃恍以

威靈悉其利鈍宜從民欲當體物情曲折周詳丁寧款
密豈容伸脚易致堵喉不律復陳連環遂解處原同於
鼃鼃築合傍夫鯨鯢果如烏鵲南飛且任白鷺前導成
田彈指麻姑屢見揚塵填海苦心精衛何妨銜石國原
師子詔與龍居樓豈仙人仍同蜃結遂使劫灰仍在覆
水能收居鄰杞菊之園人識榆枌之社遍似邠成分宅
難於介甫爭墩邑誦塗歌池平樹古雲霓望切自我西
郊疆理依然至于南海人民城郭期丁令之歸來閭井
市廛俟新豐之營造桃源再到同是神仙蓬巷薄游歸
然門第端賴老罷當道闐闐洞開任同香象渡河樓臺

湧現河山險要守望宜先婦孺流離英雄所保珠崖永
棄賈捐之之奏議全非銅柱屹然馬新息之功名能紹
第以望雲前度愛日彌年表特陳情論唯樂志馮勤貴
寵潘岳閒居肅庀魚羹勤求雀炙藥畦拄杖墅竹平安
花嶼胡牀牖梅芬馥常餌紫茄白莧隻雞饌過茅容慶
頒玉果犀錢九熊教如仲郢端明壽母猶聞勗作范滂
虞潭養堂誰誇拜有王導獨是政多慈惠歸切謳思卧
轍攀輿留鞭截鞚廉范之來何暮五袴方歌劉龍之去
蕭然一錢待選椰瓢早棄藤鼓永留且代祝延聽鐘魚
於遠寺爭圖祖別攜琴鶴於扁舟龍蛇業放之菹人居

平土鴻雁復遵於陸我憶姬公傳鶉觚有言仁人天下
之命孝子百世之宗移以贈公庶幾無媿已某等誼切
維桑言難罄竹特因輿頌敬擬序文二儒帥之功業相
須三大防之經營容緩鑄金驚而錫貢警息風塵騎竹
馮以迎還願猶童稚超居外相頗憚王商永作長城誰
如李靖 聖代敦崇孝治雅材賡束皙之詩蒼生同卜
太平相業望謝安之出

送徐鐵孫司訓藥城序

廣文官冷昔所嘲矣漁舟似屋客座無羶羊取瘦而仍
爭馬騎頻而輒罵蕘牧薪刈堂皇埃燕問奇字而誰來
倡高歌而寡和徒以官止備員人仍本處載妻孥於一
舸覽山水於別州終邇故鄉誰苛拙宦蕭閑無事且看
蝴蝶之飛清淡誰嫌仍比鳳凰之貴免葵燕麥核名實
而非難茅屋石田賦歸來而不必是以學如胡瑗才似
鄭虔咸頰首而不辭匪折腰而竟就便當蜘蛛之隱差
同款段之乘原非衣繡或竟晝行相遇銜盃雅宜春酌
獨我友鐵嶺孝廉徐君原隸籍於關東久駐防於嶺外

詩筆迴超乎流輩才名夙動乎公卿迹比鷗閑性同鷺
傲輪蹄度度琴劍年年選博士之閑曹得藁城之舊縣
全家八口桃林蕉阜之鄉萬里一官雪窖冰天之塞梅
關冬煖早對孤芳柏肆春殘誰看寸碧山經嶽麓破寒
乘月而行河涉滹沱竟夜敲冰而渡贈行詩卷重壓疲
驢耐冷衣裝輕隨歸雁油鐙土銼冷炙殘盃庶草斜陽
檐花細雨鼠肝滋味雞肋功名能無出祖而歛歔載塗
而躑躅者哉然使買山可隱卜宅而居別深懷古之思
鐵孫嘗自署所居曰懷古田舍畧遂求田之願園畦幾稜便當午橋村
店三家先營丙舍雞豚柵足供賓祭之需雨笠烟蓑

懶答漁樵之訪羹魚飯稻具見鄉風花嶼竹溪特開詩
境門無剝啄架有儲藏婦業枲麻偏工寫韻兒知稼穡
又各通經星晚露初席隅奧右有伊洛閒意是羲皇上
人時或聯吟北郭復社南園弔陸賈之荒城訪楊孚之
舊井荔浦則雲紅似繡蘿岡則月皎如霜風雨迷離長
日住分霞之嶺波濤澎湃三更登浴日之亭賸墨橫飛
吟牋對擘謂足草芥貂蟬鎬銖纓紱而况卅兩之俸八
品之官哉此之不能而第下董帷恒施馬帳邴原游學
慣詣孫崧沈重授徒或來徐曠讀書反嘲其懶著譜莫
詆其違豈真有鳳仍啗亦竟無雞可割常何草奏閒倩

馬周嚴武生平甯知杜甫長門自賦莫憐園令之貧古
墓誰諷未博昌黎之醉又不若鱸堂兀坐便作經師

鳳闕翹瞻徐偕計吏幽并氣壯不愁齏粥之酸寒文字
緣深永絕簿書之迷悶耳真定國古肥壘城空躍馬紫
荆之關射鹿黃榆之塞山原無極地近太行井陘道險
惜韓趙之興亡平泉莊荒嗟牛李之恩怨石名試劍學
郭元振之昂藏坂記示衣痛顏杲卿之忠盡撓留犁而
不醉吹簫築以孤吟手版仍支唾壺竟碎一洗輶軻之
態猶然磊落之才又况京國匪遙都門較邇偶離官舍
卽上公車將見淡墨書名泥金送喜 殿前作賦 輦

下稱詩富貴逼人文章名世臺閣之詞人斂手東南之
名士傾心王公譽以謫仙 宮禁呼爲才子也哉子行
矣酌子以酒子不能飲別我以詩我不能賡暮雲春樹
兩地相思潭水桃花幾人相送子仍返里未應如楚老
之悲我卽依人仍冀勉董生之往明春擬賦北征未
知能東裝否耳至
謂先辦草堂之貲共結香山之社則各視他年之遭際
矣

爲西關人士贈尹葆臣守戎序

西關汎直接北門之卡遙通南岸之村白鷺潭水迸於
前黃麋塘路趨其右河同玉帶坊署繡衣荔支洲仍節
度芳園叢桂里盡隨如故宅驛名懷遠十三行則蠻貨
駢羅牐溯漚源第八橋則蜑船嘔軋半塘菱芡初地香
花珠海濤麤石門山遠閭閻殷富士女昌丰我 朝特
設千戶所焉責綦重也事較煩也我葆臣守戎二兄風
擅穆清勳貽保障賀拔勝夙稱驍將王君廓何謝古人
草木亦識威名瓜果輒同甘味史萬歲猶然戍卒韓千
秋寶冠軍鋒昔以雄材曾蒞厥職臨淮相代麾幟乃益

精明衛尉易從刁斗未嘗休息時也兵氣乍銷蠻防未
撤本狐鳴之善幻仍鶴唳以先驚恐吮血而磨牙拌游
魂而放命遂乃分兵屯守竟夕親巡斥堠森羅禁防嚴
密老羅當道豈容貉子之來大范去官夙擅龍圖之望
官學伙飛勇決曾刺怒蛟人比李崇深沈仍號臥虎且
也置土圍之軍募夜飛之將原非營戶同是衙兵奮擊
豈蒼頭之倫忠義卽赤心之隊爲知家事夫豈別有肺
腸儼若神明犂然劇設耳目察姦伺變亡夙興夜寐之
勞飫酒飽鮮無暑雨祁寒之閒士有百金之賞遑卹死
生家無半菽之儲宛然夙昔所以塵靜波恬邇安遠肅

絃歌相答桴鼓不聞質庫依然麗譙如故白羊點綴棉
紅北郭之山黃蝶蕭閑草綠西園之社于栗磳自標黑
稍王全斌宜 錫紫裘周盤龍早賚以貂蟬趙伯符實
畏如狼虎大府嘉之俾晉崇堦奏膺 殊眄仍荷隆寄
總辦緝捕焉費禕辦賊共信可人王霸曉兵固當獨任
時也西粵則瘡痍未復全楚則烽燧頻驚中原之寇讐
已深瀕海則妖氛易煽乃有宿盜魁帥楊某等竊妻於
楊柳渡旁賃宅於芙蓉深側高會誇咤出入悍然人多
危帽散衣地藏大戟強弩忽見來如閃電發比疾雷沈
光爲肉飛仙楊祐稱鐵猛獸俟張燈以潛誌直破柱以

先求箭火罌灰弩窗矛穴中宵警遠原畏人知元已獻
酬輒疑眾醉無曲隄而居然伏甲至官道而未敢擊毬
虺毒潛吹豺聲審聽壯如叔虎被羽先升創似姚期攝
幘復戰笑魚游於釜底如鼠鬪於穴中陡擊餓狼逕擒
飛豹遂使三城之父老百里之黎元恐懼悚惶揄揚忭
舞驍雄抽擢方畧嚴明兵農悅安大猾自斂嗟嗟選極
一時求難百輩 中朝易帥昔少廉頗元老籌邊今誰
魏尚渾瑊勳業陶魯功名此其時矣瑩等獲居安土寶
賴長城同心却比夫幽蘭美蔭環依於大樹喜萑蒲之
可靖思桑梓之必恭偕里黨以陳詞合東南以歸美此

日營過細柳緬想英風他年峽斷大藤更銘偉績幹局
原如李及敢掣銀釵年齡定比馬援永猶銅柱畫像凌
烟之閣褒鄂威容題名鎮海之樓孫盧弭伏

樂志堂文集卷七

樂志堂文集卷八

南海 譚 瑩玉生撰

晉書跋

典午一朝史才各擅紀傳則王虞朱何編年則陸干曹
鄧稱十八家而已遺習本合東西史而迭據臧書逮貞
觀之初元有元齡之碩望合羣才而別撰奉新勅以重
編德棻輩既夙負文名淳風等亦深明厯法此稱詳洽
外並芟夷已然而競爲綺豔不求篤實本傳之所譏彈
也近宗徐庾遠棄史班後賢之所評泊也粵稽其故亦
有由焉有唐當景命之隆文格貴當時之體燕許之鴻

裁未著陳隋之遺習相沿觀綸綍之品題迺陸王之傳
論一則以文豪標六代一則以書聖擅千秋類皆宏獎
風流導揚糠粃昔范蔚宗之漢史不乏華詞沈休文之
宋書尤多儷語况以九重令辟親灑丹毫一代興王特
操銀管從風而靡斷可知矣曹髦君也而以變書仲達
臣也乃編紀首孫旂牽秀與繆播而同登周處孟觀遺
馬敦之附傳不年不月或雜亂而無章如鬼如神且俳
優之不屑潘張雅望悉載無關理亂之文羊杜殊勳孰
傳不可磨滅之概毀桓温之詔坦之濫及於彪之記庾
敳之言和嶠靡殊於温嶠苻堅載記且詳元達之南奔

門業足懋先基之遴是僧伽福德之兒柳遐實江漢英
靈所萃人紅蘭之署值金馬之廬禮樂攸司文章夙擅
張率名譽宜處祕書之官王瑒風法特留庠序之任文
柄迭掌考校彌精和成績久著才名高公業頻杜請托
仰聲華之藉甚甯報稱之靡常固不僅亢宗遺愛生徒
有碑碣之留尙書鈞禮春秋隆配享之典已

國家特建儒官廣開橫塾將以闡揚景業演迓斯文而
乃若北斗南箕筌蹄芻狗蕘牧薪采堂皇埃蕪琴瑟委
曠而弗陳巾卷寂寥而誰謁聽高歌而竟絕問奇字而
何知誰贅瘦羊仍爭所異之品倘飛蝴蝶翻嫌一事之

多苟覽斯圖其亦可以知投泥之匪污慚倚席而不講
常憲敢拘當如范甯前脩無愧庶式劉瓛已

全小汀學漢藥洲秋月圖跋

我朝粵東督學首推紅豆次及蘇齋此外若瑩所受
知尤深者顧耕石師翁遂菴師徐少園師均其選也文
章司命代不乏人乃今讀我小汀先生藥洲秋月圖而
竊嘆其胸次之高風裁之峻也先生才兼文武業守韋
平久爲關外之游遞握嶺南之節星輶暫駐水鏡屢懸
鳳藻銜兼龍編化被嶺海原稱要地弼教彌年朝廷
久憶重臣具瞻來日高郢誰曾請託和凝輒放才名陸
贄輸心常袞執理激揚特妙衡鑒甚精此時頌遍膠庠
異日備書職志無庸贅已甄別靡遺披閱偶暇巾褐自

適丹青遂留夫以錄文數千見士七十仍等簿書之迷
悶罕聞觴詠之娛游卽謂燕寢凝香森羅畫戟華堂置
酒閒理冰弦紅燭烏絲錦衾玉饌劉丹陽之廨舍但飫
豐甘謝文靖之生平足供陶寫先生風高霽月趣遠滄
洲興逸觀梅情閒對竹如白香山之歸洛社比裴令公
之住午橋圖繪荔支羹調藤菜李膺門下眾賓咸擬神
仙徐勉座中今夕止談風月昔人稱有唐權文公位隆
將相才藻冠時宋錢思公官厯方鎮英彥盈閣先生風
範殆復過之藥洲者本偽劉偏霸之離宮實周子提刑
之舊署久成試院賸見方池錦石依然鏡瀾無恙曲岸

萍枯而蛤吠小橋柳老而烏藏菱渚墨香蕉牕燈綠朱
闌傍水翠榭圍花閒設琴尊脩然笠屐雲都過眼也同
訪石留詩月正當頭何待焚香設誓見潛研堂文集際此疎星
時度斜漢欲流耀鶴不飛閑鷗亦睡砌草尙碧池蓮有
香木葉脫以吟風苔花明而泣露笑桓元子龍山之讌
落帽參軍學謝鎮西牛渚之游聽詩鄰舫憶政公之遭
遇 朶殿中秋容老子之婆娑南樓達旦但記平泉花
木屑效贊皇倘聞清禁鼓鐘輒思元九風流自賞心跡
雙清如元亮而獨醒別鬱林而肯載洞簫吹而誰謚宮
錦著而容狂琴薦枕材知陸魯望無謝人之作瓊樓玉

宇或蘇文忠有戀闕之詞殆足傳已

堂

久游場屋倍念

師恩屢謁衙齋熟知宦績獲瞻妙繪肅獻俚言良時公
讌蘭湖笑微雲之點綴來月歸舫香浦照古水之芳馨
懸知亭署定香同阮太傅筆談之著作不僅軒名拜石
比米南宮圖畫之留貽爰爲之跋

讀漢書王陽等傳書後

范史有逸民傳而班史無之

王伯厚困學紀聞曾糾其失

王貢兩龔

等傳其班氏之逸民傳乎夫孤竹懷殷殷亡以餓顯柱
下居周周衰而去亟魯君幣聘何來顏闔之家楚王駕
至其奈老萊之婦魏文造而段干木避子陽殺而列禦
寇全故侯合返東陵先生庸相北郭宜其恬居塵外高
謝人寰所謂度時不可爲故高蹈以全其志者也若許
由之於堯善卷之於舜伯成子高之於禹其何以稱焉
易曰天地閉賢人隱俟時而動者也君子之行出則允
釐世政以道濟時處則振拔器埃以卑自牧使必謂韋

布爲榮蟬冕爲辱裘褐自貴圭組已賤鴻飛何篡曷徒
違患經經自好有類沽名已故若園公綺里季夏黃公
角里光生若鄭子真嚴君平殆其可紀者也使當景運
方新明良共慶合應蒲輪之典敢同石戶之農匡稚圭
獨上封章雋曼倩深明經術迎致待留侯之計從游藉
揚子之稱其曰王陽在位貢公彈冠班氏之微旨也若
兩龔者舍惟正身而勝死善道雖所言多祖述王吉貢
禹之意

見本傳

而事勢稍殊矣是以悉如故事業並琅琊

之歸竟天天年仍來老父之弔若鮑宣者致太學之舉

幡家長

如字

子其宜牧新都案誅忠直上黨果易長雄飯

辛興而豈知及何武以俱死其亦異乎名可得聞身難
得而見逃名而名我隨避名而名我追可謂百世之師
者矣至若邴曼容若薛方若郭欽蔣詡若栗融禽慶等
皆可紀者也若所謂以禮讓進退又謂君子之道或出
或處或默或語又謂山林之士往而不能反朝廷之士
入而不能出亦班氏之微旨也後之逸民若賢比梁鴻
高如徐穉管幼安之去陶元亮之歸司空圖隱王官之
谷謝臯羽哭嚴陵之瀨知人論世猶相推重謂其不得
不逸者時也劉知幾亦有言事迹雖寡名行可崇寄在
他篇爲其標冠意仍引而未發理實得而愈彰不然隱

顯各殊行藏迥異復奚取而厯厯書之也哉

讀蔡邕郭林宗碑文書後

嘗讀後漢書蔡邕爲郭林宗碑文謂盧植曰吾爲碑銘多矣皆有慚德唯郭有道無愧色耳嗚呼邕之心折於林宗者至矣當夫桓靈失政閭豎擅權外舍彊梁將軍跋扈始則固喬並命共殉清河之誣繼則陳寶合謀翻罹北寺之禍已成黨錮豈必交關君知不軌之何如屬卽已疎而亦廢馬季良之草奏已黨附而成譏胡伯始之歷官亦溫柔而取媚於是李膺詣獄張儉辭家或俱坐以同稱或急徵而自殺竟閉門而不納果解印以俱亡誰讀賈琮之銘僅勞荀彧之葬復有姜肱韜面夏馥

翦鬚歿則聚沙爲牀生惟築土作室申屠則屋因茂樹
季英則園灌野蔬亦知茅容之賢問國事其誰答獨弔
張讓之葬誅黨人而或全獨林宗者獎拔士類名震京
師華夏罕其儔漢元無其匹車停千兩宛望神仙具減
三牲特供賓旅人倫雅善不聞覈論危言郡國周游時
見褰衣博帶折巾一角行多企慕之倫載刺盈車出有
爭歸之士乃能閉門教授卒歲優游久栖栖而弗遑竟
汪汪而莫擾疾不仁其誰甚至此際而自持雖觀象於
極微亦知人而獨哲耳迨至西邸嚮官平樂講武誅十
常侍而能盡召四方兵而實疎斬元舅於嘉德殿前迎

天子於北芒阪下卓擅廢立之舉漢定覆亡之期彼蔡
邕者亡命江海之間遠跡吳會之地刑衣已解先塋終
歸強應辟書至膺侯爵相國能夷十族祭酒便歷三臺
遷巴郡而復留奔兗州而亦止詔出懷中而竟戮燈然
腹裏而誰矜噫嘆之餘誅夷並及昔甘鼓琴而贊事今
乞黥首以成書雖王子師之輕戮善人邕實不能無罪
焉嗟乎逃深山而不仕自有門風廬冢側而多奇備徵
孝感母疾則七旬不寐叔亡亦三世同居曠代逸才閑
居翫古却五侯之幣太守督促而竟還鑄六經之文後
儒摹寫而取正邕之厓畧何遽不若林宗即使稱疾未

能淫刑以逞等拂衣於王智同飲刃於陽球禍卽烈於
北徙南徂節遠愈於名澆身毀豈陳七事之本絕鮮依
違冀三遷之榮未容偃蹇歟初周慤伍瓊說卓擢用天
下名士以收眾望故以黃琬爲太尉楊彪爲司徒荀爽
爲司空邕之從卓尙冀其大有爲哉而早決遂非事終
難濟卽存匡益言亦少從篡逆已萌播遷何酷絕鮮勤
王之畧不聞討賊之忱及正典刑反相傷痛嗚呼邕之
保身固遠愧於林宗邕之抗節亦近慙於廬植矣

南海縣志附刻聲鑑圖書後

夫女賡雜珮而詩存母賦綠衣而傳美書傳箴誠婉好
誦窈窕之章易說勞謙命婦釋樞機之語檢薛蒙妻之
訓遠續班姬輯韋逞母之言直倫孔聖同資矩矱敢羨
才華若乃頌椒銘菊之章敵玉翦綃之集稱永懷之句
譽以雅人咏新粧之詩傳之好事紅牋進謝竟誇司馬
才名香茗編成不亞左芬詞藻縱無慙於作者豈有當
於風人若今所傳南海女子聲鑑圖者采麗益新循環
無已固宜其書之煒管軼彼香奩已迴文最古首推若
蘭道慶之作已不傳彥和所稱原偽譔魏卽裴盧孰先

通其解唐惟皮陸特偶倣其詞而天寶有楊氏之製會
昌有侯氏之著則工此體者殆不鍾於男子而特鍾於
婦人哉若斯圖者精思傅會指物呈形獨申胸懷自出
機杼巧心妍手獨反覆而見能短韻狹詞更溫柔而取
媚春風蘭葉明月菱花相期百鍊之貞省識同心之語
尤所謂善構新詞文外獨絕者與當夫秋水誦關北山
書就倦學眉娘之繡嬾傳三妹之歌或隔幔而訓周官
或升座而講老子興亡備覽誰誇博士之譽節槩不羣
雅稱先生之目寶釵未列孰暇裁賤國扇誰捐何勞著
詠遂乃綜採繁縟杼柚清英析句離章鈎心鬬角單詞

詰屈片語玲瓏書之牙管一雙譜以花牋五幅編璫截
貝珠九曲以同穿交葉重花絹雙絲而互織裝之蘇合
佩以蓮枝鳳舞懷中龍蟠掌上陰陽分配文字迴環昔
黃帝有巾几之銘孔甲有盤盂之誠誰言士女獨解箴
規若宛轉以通詞更崎嶇而集字如將不盡出以自然
巧不可階古應無上詞難決絕語各清華比玉齊金悅
詩明禮星辰宛在第如江總之才文彩寶希何待秦嘉
之贈不阡不陌無對無雙理趣不凡心形俱服已獨惜
著姓無微香名未泐或容華尙幼或絳秀初嬌或弄玉
疑仙或雲英未嫁兼嫺筆札端如逸少之師妙解琴心

猶是中郎之女或韓蘭英之談笑尙有名篇或孫夫人之才思并焚遺集覽鏡遐想良用憮然固不僅道韞知名嘆惟劉柳令暉擬古品有鍾嶸已允宜共表女師甯僅附存邑乘陋粧臺之瑣記豔鏡社之遺聞何慙女史之箴便作大家之讚自在游戲綺合星稠七寶莊嚴一絲縈繞倘卽事徵如意曾朝天后以吟詩任教志陋武功專爲寶家而數典

龍翰臣師南槎吟草書後

國家重典試之臣固欲其具精鑒得實才抑浮華絕請
謁盡心考校刻意闢防而德教之隆污山川之險易采
風問俗課雨量晴

九重之耳目寄焉兆姓之身家繫焉任至鉅也恩宜渥
也甲辰省試我翰臣師銜

命粵東其衡才之當革弊之嚴目謀者載以口碑身受
者銘之心版賦闡中卽事八首流聞達於遐邇好寫遍
乎東南人盡孤寒地仍辛苦賢良擢進風化轉移物望
交推人言無間已而其星軺之所蒞玉節之所經弔古

懷人撫時感事貞淫並錄水旱必書復得南槎吟草一卷瑩受而讀之而竊嘆其用之宏也材之裕也夫野橘秋荷之作春蠶鬪蟻之吟各負盛名爭傳佳話亦祇如其常分偶爾寄其閑情卽謂趙北燕南雪來柳往卜晝侵星之句模山范水之才直到古人無慙作者猶然餘事孰見本原師丰神特異溫飽俱忘無忝科名共期忠孝

帝心特簡民瘼勤求出行所作類集歌謠入

告之言宛同謨訓真得大臣之體端宜祕室之藏漢問事以六條唐省風以五術采訪者十道安撫者六州師

殆兼之矣又况湊泊天然逕集杜陵之句

謂根雲師

高寒地

接宛同玉局之忱他日丹地並趨黃扉共拜十聯詩寫
一品集成彌搜澗陸軼材同艷門牆盛事至若根柢之
深杼柚之妙當今無輩與古維新寸心自知有目共賞
無庸贅已

書梁子春先生春堂藏書圖後

瑩
壬午除夕詩云帟帳蘆簾賦索居先生清興復何如
門前債客多於劍猶典殘釵購異書是時先洗太孺人
猶在閨二歲而痛甚濡章悲深錄扇檢邈昭之金笥本
已無多鬻郭丹之衣裝唯聞自給方嘆補袍雜紙忍言
剪髮易書迨今讀子春先生春堂藏書圖殆不禁淚泫
泫下矣夫使其擁愈百城獲同良產橫翔捷出駢馳翼
驅周磐有解帶之嗟毛義方捧檄而喜蔡襄有母宋廷
特賜冠帔韋逞之門周禮待傳音義不亦慈明之極遇
而顯揚之至願也乎然卽尹焞不仕潘岳閒居芒屨第

供錢船罕致論私財之不有爲子何慙思令器之苟成
惟親所致遂乃撤金璣而搜祕籍鬻璫珥而購叢編織
同劉氏之繩作等孟宗之被楹書善讀詎關前代之遺
文字苟論尙給故人之饌虞集曷勞於口授崔光卽養
以傭書宛如性命之相依豈謂勛名之足抵而乃陔悲
蘭敗堂慘萱零寸草空吟蓼莪竟廢秤錘孰舉幾同寇
準之瘡深藥物空收已負姜維之志遠而謂覽斯圖者
能不痛哉能不勗哉嗟嗟罄十年之讀飫於鼎烹珍萬
卷之儲孝於廬墓塵鮮民之哀慕卽當杯棬思汝父之
生平敢爛弓矢仁見苻彤下拜曷愧桑虞范逵稱名舉

知陶母又何必見畫而作日碑之泣引騶而與僧孺之
哀若瑩者折藁自愧畫荻無由君苗之筆研都焚康伯
之袴襦誰給養雞種蒜待營卻詵之墳織紵讀書倍愴
雷膺之况誠恥之也誠悼之也

陳春山圖像詩畫冊書後

春山上舍將子雲畫史爲作小照並自作感懷五古八
首山水十二燈合裝成冊而屬石溪明經署曰廬山真
面殆欲以貽後人者余讀之而不能無言也夫鸞紗自
業王僧孺且拜中丞織履相隨翟方進終爲相國韓康
伯之援作僅布襦劉真長之貧養須芒屨又况陶家有
士行卽剗薦以無妨周氏有伯仁終置酒以相對由來
側室同具苦心實使孤兒卒成令器使其周磐就舉趙
概乞封去帽導輿傳經隔幔洛濱鼓吹甘泉畫圖親款
如僕射家人起居于懿宗誕日貴猶陸贄還京特遣遠

迎寵似馮勤上殿輒令勿拜不亦撫孤之心竊慰而報
母之願稍償乎而乃才優三絕却詔酒狂技了十人羣
推畫隱信神仙之可學業婦孺之皆知潘岳閑居尹焞
善養亦望雲而致慨曾賦遠游第飲水以言歡終慙美
祿歲月易得門庭晏如頭顱可知趾爪欲印杜拾遺有
妹宛在鍾離元承旨之妻未朝興慶盃盤燈火雞犬妻
孥宜在邱壑之中誰謂羲皇以上淋漓賸墨宛驚風雨
於前宵咫尺輕縑直吐虹霓於萬里指青山而可隱誰
迂板輿官畫院以無由忍言丹轂嗟乎上舍僅欲以詩
畫傳哉然而不寄當歸能言寸草未嘗捧檄何必賜金

麻炬燭書時藝髮以遑恤錦囊題句縱嘔心而不辭臣

本布衣是真畫者丹青之紀述榮於石窮延鄉詞翰之

流聞貴比金章紫綬生綃欲濕采筆橫飛舞如意以寄

懷奪錦標而上壽

君近以畫社擅場

豔無三婦讀尊前集以能

歌足但一夔

者嗣庾生能讀父書嘗受業於余所作駢體文及詩頗工亦善畫

寫畫中

山而不賣赫蹏盈架藹然孝子之廬

綽楔旌門閑甚

高人之屋庾杲之之嘗候愧匪林宗蘇長公之慨然杲

爲孟博紀半生之落拓撫七尺之昂藏梨栗孫多冰霜

人老草堂貲辦定傳將母詩工輞水圖成端笑示兒編

在昔南田草衣少時流離瑣尾以畫釵得生遂創沒骨

花一派賣畫以養而上舍幸無需此也然業並可傳矣
骨肉相依鬚眉欲換孰謂文章千古竊傷哀樂中年而
謂他日寶斯冊者能不祕甚楹書而恪同庭誥也哉余
久悔詩名未嫻畫理同傷蒙楚竟廢蓼莪上舍之才余
竊愧之上舍之遇余反妒之辱請作序泫然書此劉孝
標此迹敬通序生平而實異潘孟陽知交補闕問末座
以無因

余識君於洗
太孺人歿後

良可慨已

丹林圖書後

昔韓魏公在北門有詩云不羞老圃秋容淡且看黃花
晚節香乃今讀大中丞石琴先生丹林圖而歎其後先
一轍也夫蒼然暝色落木平蕪同緬秋光黃花紅葉原
有蕭閒之趣不無搖落之悲是以一夜新霜四山斜照
黑雅無數白雁長征照流水以偏明醉西風而欲墮下
同夔峽客先工部之聽冷到吳江人憶信明之句涼波
湛湛招魂而曾過洞庭暮雨瀟瀟訪舊而特游吾谷類
皆漁樵故侶泉石畸人或賭墅尋詩或租船詠史醺醺
借十分之豔載酒看山臙脂留一抹之痕畫圖名世山

郭水村而外板橋茅店之間臘粉零金寒蜚瘦蝶若乃
重臣開府元老籌邊此身豈宜置邱壑之中相賞固當
出雲霞之表卽謂哀樂無端榮悴一致亭皋隴首微哦
柳惲之詩臘水殘山當換黃筌之筆

黃筌父子有秋山圖見圖畫見聞志

諧隱者玩花而稱嘆誰似文僖記昔年種柳而泣然人
如宣武亦何必品題枯樹點綴寒山如張雪景於金陵
宛賦秋聲於歐九會心不遠含意未伸三復斯圖試爲
轉語原與蒼松翠柏均耐歲寒肯隨姹紫嫣紅並爭春
豔秋香滿院偶觸禪心畫錦名堂終論相業保初節易
保晚節難有同情爾

吳雁山孝廉嶺南荔支譜題詞

身未慙於瀘戎足未抵於泉興而必欲砭蔡鍼徐步王
踵張雖屬土風之操終慙鄉曲之見然自尉佗備物配
鮫魚而作貢漢武移植等扶桑而署名五侯十置疏紀
永元林邑桂陽詩說天寶荔支之稱於中土嶺南其最
古矣乎後賢狀南方之草木志桂海之虞衡罕聞覩縷
何況專書增江紀於馬氏而僅列其名廣中譜自鄭熊
而已湮其說其他編璫截珥零金屑玉類不足以導揚
末議搜羅令品斯亦吾鄉之闕典好事之深憂也雁山
詞丈坡老詩才曲紅賦手結論園之社停揀樹之航爰

採舊聞撰成斯譜其分門也當其紀事也詳彙此五編
都爲一集文賦之繁詩詞之侈蓋闕如焉登閩志而悉
芟繪已圖而盡雍殆洪離之別傳而粵嶠之奇書已夫
陶穀清異錄譏其不逮李肇國史補乃言尤勝徐氏筆
精糾君謨景綸之誤浪齋便錄證長安洛陽之異誠齋
詩註稱最上其綠蘿客惠紀聞謂漸佳惟黑葉類皆貴
耳賤目悅甘忌辛揄揚標榜迄無定論然譜牒旣詳品
流斯析憶往事於六載賦新詞之百篇爲日旣寡蓄書
不多摭拾靡精蒐羅豈徧今讀是書殆將覆瓿權衡迴
異敢沿秀水之談軒輊所存又覲陳留之序

陳任齋菊醉圖題詞

僕居無老圃宅鮮東籬年年九日慣負花時月月重陽

唯耽酒侶丙戌秋杪屬素琴之獨擁期白衣而不來乃

有枉游屐遞吟牋踐投轄之家風展題糕之歲序集因

賢主座盡故人遂乃命駕乎沁芳之亭扶筇乎醉雨之

齋醉雨齋者吾友任齋陳氏昆仲藝菊之所也珉枝金

萼鵷集鳳儀芳實暉藻雲布霧散相與窮偃泊肆沈酣

柳遠本無拘檢張敷閒理音辭拍銅斗以高吟注瓦盆

而共醉任齋逸情雲上壯懷颺舉使其生希徐邈死慕

劉伶或八日而不醒謂此生其足了當此庭芳靡謝家

釀新開友是忘年臣偏卜夜做元行恭之劇飲縱高季
式之酣歌拓金戟以昂藏倒玉缸而斟酌雖狂奴之故
態亦雅人之深致者焉而乃衛武賓筵早聞立歲劉杳
酒職不愧古人謝舉乃不及臣公榮何必語此每至眼
花耳熱風管雲歌僅從壁上以觀敢作局中之想客恒
滿而酒不空我獨醒而人已醉固佳游所同歎抑好事
之深憂也而不知神明居律呂之先嗜好得鹹酸以外
一枝相對無煩枕麴藉糟也萬花如簇宛已銜杯漱醪
也吟興自洽觴情宛滋彼傳癖馬癖阮屐祖財陶宏景
之樂聽松王徽之之喜看竹類皆賞給翫周金迷帑醉

神解獨徹丹青遂留南山如見誰云後鮮有聞東海欲
傾竊愧未知其趣

樂志堂文集卷八